



Du premier âge, & des inuenteurs de plusieurs choses, mesmes des instruments Musicaux.

EN ce premier âge, les nations commencerent à multiplier, en sorte que la necessité les contraignoit d'inuenter des arts, & moyens de viure: entre lesquels Iabel fut premier inuenteur des tentes & pauillons, & garder les troupeaux aux champs. Tubal & Iubal se firent paroistre inuentant les instruments Musicaux, comme Orgues, Harpes, & Cymballes d'airain & de fer. Aussi Dieu donna à Adam au lieu d'Abel, nouvelle semence, & la femme enfanta Seth, & Seth fut pere d'Enos qui commença religion, & à inuoker le nom du Seigneur, & auoir recours à luy. Et d'iceux vint vne grande generation: mais Adam ayant vescu neuf cens trente ans, il mourut. Et quand les nations furent multipliées d'âge en âge, les puissans de la terre prindrent femmes, dont leur vint des enfans, qui furent Seigneurs & gens de renom, Et lors Dieu voyant accroistre la malice des hommes, & que l'imagination de leur cœur n'estoit que mal, se repentit d'auoir fait l'homme, & dist, l'effaceray de la terre tout ce que j'ay crée, depuis l'homme iusques aux animaux, mais Noé trouua grace deuant Dieu.